

# 67 terima Anugerah Pelajar Cemerlang PSR 2017 SR YSHHB



MENTERI Pembangunan, Yang Berhormat Dato Seri Paduka Awang Haji Suhaimi bin Haji Gafar juga selaku Ahli Lembaga Pengarah YSHHB menyampaikan anugerah pelajar cemerlang kepada cucunda Yang Teramat Mulia Paduka Seri Pengiran Anak Puteri Hajah Masna binti Al-Marhum Sultan Haji Omar 'Ali Saifuddin Sa'adul Khairi Waddien, Pengiran Nur Aabidah Syifa binti Pengiran Anak Haji Mohammed Al-Mokhtar.

**BANDAR SERI BEGAWAN,** Rabu, 4 April. - Seramai 67 pelajar terdiri daripada 28 lelaki dan 39 perempuan menerima Anugerah Pelajar Cemerlang PSR 2017 Sekolah Rendah Yayasan Sultan Haji Hassan Bolkiah (YSHHB) bertempat di Dewan sekolah berkenaan.

Hadir selaku tetamu kehormat bagi menyempurnakan majlis penyampaian anugerah, Menteri

Pembangunan, Yang Berhormat Dato Seri Paduka Awang Haji Suhaimi bin Haji Gafar juga selaku Ahli Lembaga Pengarah YSHHB.

Terlebih dahulu dalam ucapan alu-aluan yang disampaikan oleh Pengetua Sekolah Rendah YSHHB, Dayang Hajah Mariam binti Haji Ladi antara lain menyatakan, majlis adalah sebagai penyuntik inspirasi dan motivasi

kepada warga sekolah terutama sekali para pelajar Tahun 6 tahun ini untuk terus berusaha dalam mencapai kemajuan dan kejayaan yang cemerlang.

"Tidak dapat dinafikan sokongan dan kerjasama yang padu ibu bapa adalah penyumbang yang sangat besar dalam kejayaan semua pelajar hari ini," katanya lagi.

Antara para penerima anugerah



AWANG Abdul Qawi bin Khairul Shaharim.



DAYANG Elsa Rania binti Haji Mohd Haizam.

Oleh : Dk. Siti Redzaimi Pg. Haji Ahmad  
Foto : Hamzah Mohidin

pelajar cemerlang yang mendapat 5A ialah cucunda Yang Teramat Mulia Paduka Seri Pengiran Anak Puteri Hajah Masna binti Al-Marhum Sultan Haji Omar 'Ali Saifuddin Sa'adul Khairi Waddien, Pengiran Nur Aabidah Syifa binti Pengiran Anak Haji Mohammed Al-Mokhtar.

Pada majlis itu, Pelita Brunei telah sempat menemui dua pelajar cemerlang iaitu Awang Abdul Qawi bin Khairul Shaharim dan Dayang Elsa Rania binti Haji Mohd Haizam.

Awang Abdul Qawi melahirkan rasa syukur kerana telah berjaya mendapat 5A dan memilih untuk meneruskan pembelajarannya di Maktab Sains Paduka Seri Begawan Sultan (MSPSBS).

"Saya ingin mengucapkan terima kasih kepada para guru yang selama ini mengajar saya dan kedua ibu bapa serta keluarga kerana terus memberi sokongan

kepada saya," ujarnya.

Dayang Elsa Rania pula memilih untuk terus menuntut di Sekolah Menengah YSHHB kerana beliau sudah biasa dengan suasana sekolah berkenaan dan yakin di manapun beliau bersekolah, beliau masih mampu membuat yang terbaik di peperiksaan akan datang.

Ditanya mengenai persiapan peperiksaan, beliau menyatakan beliau hanya mengikuti kelas tuisyen bagi matapelajaran Matematik sahaja sementara yang lain beliau hanya mengikuti kelas tambahan yang diadakan di sekolah.

"Saya tidak menyangka saya mampu mendapat 5A dan alhamdulillah ini semua adalah berkat doa kedua ibu bapa dan usaha yang sayang lakukan selama ini dan sokongan guru-guru yang tidak pernah jemu mengajar," ujarnya.

## Zakat menyucikan harta



KETUA Seksyen Kutipan, Bahagian Kutipan dan Agihan Zakat Majlis Ugama Islam Brunei, Awang Haji Mohd Khalid bin Haji Timbul (kiri) dan Penerima Kanan Fakulti Syariah dan Undang-Undang, Universiti Islam Sultan Sharif Ali (UNISSA), Dr. Haji Abdurrahman Raden Aji Haqqi (kanan) membincangkan mengenai zakat dalam Bengkel Aplikasi Mazhab Syafi'i.

Berita dan Foto : Haji Ariffin Mohamad Noor / Morshidi

**BANDAR SERI BEGAWAN,** Rabu, 4 April. - Dalam usaha meningkatkan kefahaman dan kemahiran berkaitan bab Perkiraan Zakat, seramai 38 peserta terdiri daripada golongan muallaf, masyarakat awam dan ahli jawatankuasa takmir masjid telah menghadiri Bengkel Aplikasi Mazhab Syafi'i yang diadakan di Dewan Serbaguna, Jame' 'Asr Hassanil Bolkiah, di sini.

Bengkel anjuran Pusat Penyelidikan Mazhab Syafi'i (PPMS) dan Pusat Kepimpinan dan Pembelajaran Sepanjang Hayat (PKPSH), Universiti Islam Sultan Sharif Ali (UNISSA) telah mengetengahkan dua pemudah cara bagi

melaksanakan bengkel secara teori dan praktikal, iaitu Penyarah Kanan Fakulti Syariah dan Undang-Undang, UNISSA, Dr. Haji Abdurrahman Raden Aji Haqqi dan Ketua Seksyen Kutipan, Bahagian Kutipan dan Agihan Zakat Majlis Ugama Islam Brunei, Awang Haji Mohd. Khalid bin Haji Timbul.

Zakat, jelas Dr. Haji Abdurrahman dari segi bahasa membawa maksud bersih, suci, subur dan bertambah kebajikan, manakala dari segi syarak membawa maksud mengeluarkan sebahagian daripada harta yang tertentu sebanyak dan jenisnya untuk diberikan kepada

orang yang berhak dan layak menerimanya.

Sementara itu, Ketua Seksyen Kutipan, Bahagian Kutipan dan Agihan Zakat MUIB, Awang Haji Mohd. Khalid bin Haji Timbul membincangkan mengenai pengiraan zakat harta dan emas.

Menurut beliau lagi, zakat emas yang wajib dikeluarkan iaitu sebanyak 2.5 peratus atau 1/40 daripada emas tersebut apabila cukup haul dan nisabnya.

Bengkel bertujuan bagi memberikan kefahaman dan penghayatan kepada para peserta akan kepentingan zakat serta pendedahan mengenai kaedah untuk perkiraannya dan dalam masa yang sama turut memberi nilai tambah serta menyebarluaskan lagi ilmu berkaitan dengan zakat.

## Dihadapkan ke mahkamah atas pertuduhan rasuah

Siaran Akhbar : Biro Mencegah Rasuah

**BANDAR SERI BEGAWAN,** Rabu, 4 April. - Seorang warganegara tempatan, Dayang Alina binti Mohd. Ariffin telah dihadapkan ke Mahkamah Majistret Bandar Seri Begawan atas enam (6) pertuduhan di bawah Bab 6(c) Akta Pencegahan Rasuah (Penggalt 131).

Siasatan yang dijalankan oleh Biro Mencegah Rasuah (BMR) mendapati bahawa tertuduh di antara bulan Januari 2008 hingga Jun 2009 telah memberikan enam (6) borang permohonan bagi mendapatkan Kad Pengenalan Hijau, Negara Brunei Darussalam yang diterima daripada warga asing, iaitu rakyat Indonesia dan Filipina kepada Kerani Pendaftaran yang bertugas di Bahagian Kad Pengenalan, Jabatan Imigresen dan Pendaftaran Kebangsaan, di mana tertuduh mengetahui borang permohonan tersebut mengandungi keterangan palsu yang mana warga-warga asing berkenaan tidak pernah bekerja sebagai buruh dan pembantu rumah seperti dinyatakan di borang permohonan tersebut.

Semasa tertuduh dihadapkan ke Mahkamah, tidak ada pengakuan diambil di hadapan Majistret dan kes ini akan disibut pada 18 April 2018 bagi memberi ruang kepada tertuduh untuk mendapatkan khidmat guaman.

Majistret Kanan kemudian telah membenarkan tertuduh dibebaskan dengan ikat jamin sebanyak BND5,000 (Brunei Lima Ribu Ringgit) atau seorang penjamin tempatan. Pendakwaan bagi kes ini dijalankan oleh Timbalan Pendakwa Raya, Awang Shamsuddin bin Haji Kamaluddin.